



partii naleraq

UKA2015/24

8.10.2015

**Kalaallit Nunaanni Namminersorlutik Oqartussat Inuk pillugu paasissutissanut inatsimmut Kunngip peqqussutaata Kalaallit Nunaanni atortuulersinneqarnissaa pillugu Inatsisartut aalajangiiffigissagaat.**

(Aningaasaqarnermut Aatsitassanullu Naalakkersuisoq)

Uumap peqqussutip Kalaallit Nunaanni atuuttulersinneqarsinnaaneranut aalajangiiffigissassaq Partii Naleqqamiit imatut oqaaseqarfigissavarput.

Oqaaseqarnitsinni oqaatigissavarput misissuinitanni paasigatsigu atuuttulersitsinerup kingunerisinnaammagu allaffissornermik kinguneqartitsisinnaasoq paasigatsigu, aammalu misissuinitanni paasillugu Savalimmiut allatukanneq aaqqiissummik paasissutissanik avitseqatigiinnermik nunat allat akuerisinnaasaannik aaqqiissuteqarnikuusut, taamaattumik aallarniutigalugu Naalakkersuisut kaammattorusunnarput tamakkua tamaasa ilanngullugit uunga aalajangiinnginnermi misissoqullugit.

Tassami inunnut ataasiakkaanut paasissutissat kikkunnut tamanut siamannginnissaat pingaaruteqartorujussuuvoq, aammalu akuersaaruminaatsumik nunatsinni ukiorpassuanguulersuni tamakku paasissutissat inatsisit sinaakkutissai saneqqutaaralugit atorneqartarnikuullutik. Taamaattorli aamma ukununga "oqajamaanut" (whistleblowerinut) inatsisitigit sinaakkusersuinissamut paasinninnerput tunngavigalugu aamma attuumassuteqarsinnaallutik. Taamaattumik paasissutissat tamakku annertuumik kallaasinnaasut sukumiisumik qulaajaqqaarnagit kingunissaalu iluamik paasinatigit aalajangersaanissaq Partii Naleqqamiit eqqarsarnartoqartillugu oqaatigissavarput. Taamaakkaluartorli aamma innuttaasut illersugaanissaat pingaaruteqarpoq, uanilu takuneqarsinnaavoq danskit inatsisaat aamma EU inatsisaanik aallaaveqartoq (peqqussut 95/46 Oktobarip 24-ianeersoq 1995).

Inunnut ataasiakkaanut paasissutissanik avitseqatigiittarnerata mianernarlunnartuunera kingullermik ippassaani nutaarsiassaqaqfinni uppernarsisinneqaqqippoq EU-mi eqqartuussiviit itigartitsissutigimmassuk assersuutigalugu facebook-imi inunnut ataasiakkaanut paasissutissat Europamiit USA-mut tunniunneqarsinnaanngitsut, atornerlunneqarsinnaanerata tunngavilersuutigalugu.

Ilami allaat eqqarsaatigisariaqarparput taamannak inuup imminut tunngasumik paasissutissanik qinnuteqaraluarnerup itigartissutigineqarnera attanneqarnerasoq kiap nakkutigissavaa, sorpassuillu allat tunngavigalugit siunnersuutigerusunnarpoq qanoq Savalimmiormiut una siunertaq pingaarutilik "Naalagaaffeqatigiit" iluanni aqqissimaneraat, innuttaqassutsiminnut naapertuuttumik aammalu nunat suleqatigisat akuerisinnaasaannik, tassami aamma paasissutissanik avitseqatigiinnisamut nunat ataasiakkaat inatsisitigit illersugaanissaat qulakkeerneqartussaasoq piumasaqaataagami.

Una alloriarnissaq pingaaruteqarpoq aammalu mianersortumik alloriarnissaq aamma pingaarutilerujuulluni. Taamaattumik ataatsimiititaliamut ingerlatinneqassappat ingerlatinneqassanngippalluunniit pingajussaaneeraneqannginnermini qulaajangassat arlaqarmata Partii Naleqqamiit naammassineqarnissaat kissaatigissavarput. Tassanilu sulinermi aamma tusarniaasimanermi akissuteqaatit innersuussutigalugit.

Taama Partii Naleqqamiit oqaaseqarfigaarput, qujanaq